



INFORME DE LEGALIDADE SOBRE O PROXECTO DE DECRETO POLO QUE SE REGULA A COOPERACIÓN DA ADMINISTRACIÓN XERAL DA COMUNIDADE AUTÓNOMA DE GALICIA COS CONCELLOS NA SELECCIÓN DOS MEMBROS DOS CORPOS DE POLICÍA LOCAL, VIXIANTES MUNICIPAIS E AUXILIARES DE POLICÍA LOCAL

Esta Secretaría Xeral Técnica de conformidade co artigo 43.2 da Lei 16/2010, de 17 de decembro, de organización e funcionamento da Administración xeral e o sector público autonómico de Galicia, e logo de examinar o *“Proxecto de Decreto polo que se regula a cooperación da Comunidade Autónoma de Galicia cos concellos na selección dos membros dos corpos de policía local, vixiantes municipais e auxiliares de policía local”*, emite o seguinte,

INFORME

1. Marco normativo e competencial

A Lei 4/2007, do 20 de abril, de coordinación de policía locais prevé nos puntos 6 e 7 do artigo 32 que os concellos poderanlle solicitar á consellería competente a colaboración na realización das probas de selección para o ingreso, ascenso ou promoción aos corpos de Policía local na forma que regulamentariamente se estableza, e que así mesmo, a Xunta de Galicia poderá asumir a convocatoria das prazas vacantes, e, de ser o caso, a formación e o período de prácticas naqueles concellos que así o acorden mediante os oportunos convenios de colaboración.

Así mesmo a Xunta de Galicia poderá asumir a convocatoria das prazas vacantes e, no seu caso, a formación e o período de prácticas naqueles concellos que así o acorden mediante os oportunos convenios de colaboración.

A Lei 1/2007, do 15 de xaneiro, da Academia Galega de Seguridade Pública establece no seu artigo 4 2,b) dentro das funcións formativas no ámbito da formación policial: “colaborar coas administracións competentes na selección do persoal dos corpos da policía de Galicia e das policía locais”.

2. Necesidade e oportunidade

A Lei 4/2007, do 20 de abril, de coordinación de policía locais prevé nos puntos 6 e 7 do artigo 32 que os concellos poderanlle solicitar á consellería competente a colaboración na realización das probas de selección para o ingreso, ascenso ou promoción aos corpos de Policía local na forma que regulamentariamente se estableza, e que así mesmo, a Xunta de Galicia poderá asumir a convocatoria



das prazas vacantes, e, de ser o caso, a formación e o período de prácticas naqueles concellos que así o acorden mediante os oportunos convenios de colaboración.

Así mesmo a Xunta de Galicia poderá asumir a convocatoria das prazas vacantes e, no seu caso, a formación e o período de prácticas naqueles concellos que así o acorden mediante os oportunos convenios de colaboración.

Este artigo non se desenvolvera ata o de agora polo que a FEGAMP e a Xunta de Galicia, en concreto a Vicepresidencia e Consellería de Presidencia, Administracións Públicas e Xustiza por medio do organismo autónomo Academia Galega de Seguridade Pública, promoveron a sinatura dun Protocolo de Colaboración que se aprobou no Consello da Xunta de Galicia o 16 de febreiro de 2017 e asinado o 3 de marzo de 2017.

Desta cooperación xurde a necesidade da elaboración dunha norma reguladora do proceso de actuación para a súa operatividade, adaptado á diferente natureza da cooperación requirida para cada caso.

A cooperación mediante a asunción pola Administración Xeral da Comunidade Autónoma da convocatoria das prazas vacantes presenta unha certa complexidade, porque é preciso que os concellos interesados deleguen as súas competencias relativas á convocatoria e desenvolvemento dos procesos selectivos. Só así a Administración autonómica poderá dispoñer das facultades necesarias para ditar os actos e as resolucións que dean cobertura xurídica aos devanditos procesos. De aí que sexa preciso regular con detalle o contido necesario dos correspondentes convenios.

3. Tramitación

Polo que respecta á instrución na elaboración do proxecto normativo, esta acomodouse ao procedemento legal e ás prescricións contidas nos artigos 40 a 44 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia (LOFAXGA)

Así, a Academia Galega de Seguridade Pública, centro directivo impulsor remitiu ao Servizo Técnico Xurídico o borrador da disposición acompañado dos seguintes documentos:

- Unha memoria xustificativa (artigo 41.2.a da Lei 16/2010, do 17 de decembro).
- Unha memoria económica (artigo 41.2.b da Lei 16/2010, do 17 de decembro).
- Unha táboa de vixencias (artigo 41.2.d da Lei 16/2010, do 17 de decembro).



- Unha memoria xustificativa de non ser necesaria a consulta previa do disposto no artigo 42.6 da LOFAXGA.

Así mesmo consta o acordo previo de inicio do procedemento de elaboración da dita disposición asinado pola persoa titular da Vicepresidencia e Consellería de Presidencia, Administracións Públicas e Xustiza (art. 41.1 da Lei 16/2010, do 17 de decembro)

Unha vez recibida a documentación e logo do seu estudo, o Servizo Técnico-Xurídico da Subdirección Xeral de Réxime Xurídico, elaborou o preceptivo informe e obtivo a aprobación inicial do anteproxecto como proxecto pola persoa titular da Vicepresidencia e Consellería de Presidencia, Administracións Públicas e Xustiza (artigos 41.2 c) e 41.3 da Lei 16/2010, do 17 de decembro).

Unha vez aprobada inicialmente a disposición como proxecto, este publicouse na páxina web da Consellería, na relación dos procedementos de elaboración de disposicións administrativas de carácter xeral que estean en curso, indicando o seu obxecto e estado de tramitación, así como a posibilidade que teñen as persoas de remitir suxestións e a forma de facelo (artigo 9 da Lei 1/2016, do 18 de xaneiro, de transparencia e bo goberno e artigo 41.4 da Lei 16/2010, do 17 de decembro).

Posteriormente o Servizo Técnico-Xurídico solicitou os informes dos órganos e unidades administrativas que debían pronunciarse sobre o texto do proxecto.

Así mesmo o órgano tramitador, o Servizo Técnico Xurídico, someteu o proxecto á audiencia da Presidencia e do resto de Consellerías da Xunta de Galicia así como á Federación Galega de Municipios e Provincias (FEGAMP), á Asociación de Xefes e Mandos de Policía Local (AXEMPOL) e aos sindicatos Comisiones Obreras (CCOO), Confederación Intersindical Galega (CIG), Unión Xeral de Traballadores (UGT) e Central Sindical Independente e de Funcionarios (CSI- CISF).

Consta no expediente o informe da Academia Galega de Seguridade Pública sobre as alegacións formuladas durante os trámites de audiencia e exposición pública, téndose presentado alegacións polas seguintes entidades: Axencia Galega para a Modernización Tecnolóxica de Galicia, a Dirección Xeral de Función Pública da Consellería de Facenda, a Secretaría Xeral para o Deporte, CCOO, UGT e o Sindicato Profesional de Policías Municipais de España en Ourense (SPPME) e a Federación Galega de Municipios e Provincias.

Resultou preciso solicitar un informe económico-financeiro da Dirección Xeral de Planificación e Orzamentos e un informe sobre as cuestións de legalidade e técnica normativa da Asesoría Xurídica Xeral.



Ao tratarse dunha disposición administrativa de carácter xeral que puidera ter repercusións en cuestións de xénero ao abeiro do artigo 8 da Lei 7/2004, de 16 de xullo, galega para a igualdade entre homes e mulleres e do artigo 42.2 da Lei 16/2010, do 17 de decembro, resultou preciso requirir informe sobre o seu impacto de xénero.

Así mesmo, ao regularse no proxecto de decreto procedementos administrativos foi preciso solicitar informe á Dirección Xeral de Avaliación e Reforma Administrativa, a tenor do previsto no artigo 42.7 da Lei 16/2010, do 17 de decembro.

O 30 de agosto de 2017 a Secretaría Xeral de Igualdade emitiu o preceptivo informe sobre o proxecto de decreto.

O 19 de setembro de 2017 a Dirección Xeral de Avaliación e Reforma Administrativa emite informe indicando a necesidade de realizar adaptacións no proxecto de Decreto. Unha vez realizada tales adaptacións este órgano emite informe favorable con data 20 de setembro de 2017.

O 9 de outubro de 2017 a Dirección Xeral de Planificación e Orzamentos emitiu informe favorable sobre o proxecto de decreto.

O 6 de outubro de 2017 a Comisión de Coordinación de Policía Local aprobou por unanimidade o texto do presente proxecto de Decreto, ao abeiro do previsto no artigo 17 da Lei 4/2007, do 20 de abril, de coordinación de policía local.

Finalmente, o 9 de outubro de 2017 a Asesoría Xurídica emitiu o correspondente informe no que realiza unha serie de observacións, tanto de técnica normativa como respecto ao contido do articulado.

Dende a Academia Galega de Seguridade Pública, e co fin de adecuarse ao informe da Asesoría Xurídica, remítese a seguinte documentación:

- Memoria xustificativa da adaptación parcial do texto do proxecto de decreto ao informe da Asesoría Xurídica.
- Texto do proxecto de decreto adaptado ao informe da Asesoría Xurídica.

4. Legalidade

En cumprimento do disposto no artigo 12 da Lei 3/2014, do 24 de abril, do Consello Consultivo de Galicia e de conformidade co artigo 43.2 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, o proxecto



someterase a informe do Consello Consultivo de Galicia previa a súa aprobación definitiva pola persoa titular da Vicepresidencia e Consellería de Presidencia, Administracións Públicas e Xustiza. Seguidamente, o proxecto someterase á Comisión de Secretarios Xerais previa á súa aprobación polo Consello da Xunta de Galicia, de conformidade co dito artigo 43 da Lei 16/2010, do 17 de decembro.

De acordo co indicado, e logo da proposta elevada pola Subdirección Xeral de Réxime Xurídico, considérase que este proxecto de decreto reúne as condicións esenciais para a súa aplicación e efectividade polo que se informa favorablemente o mesmo.

Santiago de Compostela, 9 de outubro de 2017

A secretaria xeral técnica da Consellería de Presidencia, Administracións Públicas e Xustiza